

四庫全書

集部

欽定四庫全書

溫恭毅集卷二

明 溫純 撰

疏

仰遵成命糾正冒襲以彰法紀疏

兵科

本月初九等日臣等接到兵部題覆雲南巡撫陳大賓
巡按劉翹各叅原任黔國公沐朝弼疏其始謂朝弼既
經勘明欲咨吏部議襲沐昌祚祖職其後又據撫按叅

劾謂朝弼欺隱正犯蔣旭等真為下愚不移欲待各事結的有悔悟畏法之意另請定奪其子沐昌祚匿比無良亦咨吏部待事結之日議擬施行隨已奉有欽依又二十三日又接到吏部題覆兵部前咨謂朝弼既經撫按勘明其子沐昌祚自應照例襲爵又蒙皇上俞允臣等待罪諱科職司糾正不能不為我皇上之命令惜國家之法紀惜蓋自沐朝弼革職以來其子昌祚固難以父故而靳祖職然所以遲遲其襲者固以朝弼之罪一

日未明則朝廷之法一日未正朝廷之法一日未正則
昌祚之襲自難輕議且節年科部諸臣之所與該鎮爭
者法耳豈特為彼母嫂莊田罪犯哉故三者而一涉含
糊遷就則朝廷之法即蕩然矣今按朝弼母嫂雖願留
滇莊田雖經處分至於罪犯蔣旭等乃係撫按緝獲則
朝弼撫抵之罪猶在蔣鑑既尚未獲則朝弼占愴之罪
如故是朝弼不肯舍一二罪犯以尊王命朝廷乃輕授
極品公爵以優昌祚蔣鑑之獲否雖不足為重輕而國

家之法紀則闕繫甚大况停襲之命甫下而准襲之典隨行臣不知兵部諸臣即咨吏部與同會議否也盖當未覆之先臣純恐致冒濫已謬向侍郎曹亨謂既有前咨即應會議使移咨矣會議矣而又准令承襲其責在吏部無疑若不亟咨又不與會議其事則耽延遲緩之狀隱有成就該鎮冒襲之意其咎將孰與歸哉夫天下最可憂者莫大於使君父之命朝更而夕改始言之而終不能行命數改則法亂法不行則人玩且勲爵重典也

違逆重罪也朝弼以罪而蒙恩成命既出而復反其所
繫豈淺淺哉近該部題覆有一事而數變其說有一疏
而自相矛盾如京營一議徒令人竊歎扼腕臣等不謂
我聖明在上而令法紀不明命令不一若此也伏乞皇
上念國紀不可不正思明命所在必行除沐朝弼聽彼
處撫按刺期拿送蔣鑑正身另奏定奪外其昌祚襲替
一節仍遵前旨候諛鎮事結之日方許酌議施行庶法
典明而主勢尊命令信而國威振矣

秋防屆期時事可慮乞賜大加振飭肅兵威以

預圖安攘疏

兵科

臣等竊計敵人自元年東犯薊永西犯汾石之後獨去秋雖入雲中旋即引去一二年來在各鎮猶號寧謐此豈我之兵力果能震懾其心使不敢犯抑歛翼養威正諸酋不測之謀今春徂夏少有壓境之塵即便張皇坐困而況秋高馬壯氣肅弓勁又不知何以應之故今歲秋防臣等以為較往歲尤不可不嚴蓋往者敵患獨陝

西三邊為急宣大偏老次之薊鎮猶屬內地自庚戌以來急莫如薊是昔雖不能守在四夷而猶守在邊境今不能守在邊境而在守畿輔且所謂守者土兵既難補練敵臺又未報完此其積怯之勢一可慮也往所患者隣邊居民或被搶掠今長驅深入甚則攻城破郡震搖京邑此其剝膚之虞二可慮也往邊塵一起猶賴天兵救援今營兵日見消耗無論遠征萬一敵騎近郊不知統兵出戰者何將隨將敢戰者何兵恐兵不識將將不

識兵不惟不敢言戰雖令出都門堅守營壘亦難矣此其本枝俱弱之勢三可慮也宣大偏老近以敵騎蹂躪既失耕穫之利敵即不來亦恐坐困况偏老人心素無固志大同故套惟恃通賄今幸明正其罪蠢爾敵入必且以失利為恨非我猛將大振軍威將來事勢尚有不可知者至於陝西套虜遼東土蠻各懷報復之心此其無所不備無所不寡之勢四可慮也故臣等以為今歲秋防較往歲尤不可不嚴幸賴皇上軫念邊圉凡督撫

將領業已更置戰守機宜業已申飭但臣等私憂過計竊據目前時事盖有不可盡恃者一如薊鎮自譚綸戚繼光練兵以來所費錢糧亦云不貲若一旦以瓜期而去不惟盡棄諸臣前功使不得目覩其成以報天子而後之繼者萬一意見不同又另作一格局則今日安邊之計祇為國家耗財之地而邊事終不可為矣臣等以此謂各邊文武諸臣既擇焉而後用之果才矣不但今歲秋防不得輕易雖不拘年限但求為國家坐鎮一方

則就任陞賞未有不可以酬其勞者如其不才則各路兵馬已分布矣即在論列凡罪犯深重者固難輕貸其應降調等項如督撫總兵則先就彼降罰叅遊以下則先處以軍法通候秋防畢日另行議奪至於叅遊守備果負勇畧既難輒棄一為更置徒費往還豈若據其被論輕重即於本任降級懲戒嚴飭軍門勒令改圖如半年之內仍舊不悛徑奏問遣昔唐臣陸贄以庶官遷謫量移近地謂之橫移今邊臣之朝東暮西實與此類臣

等願該部凡用邊臣慎勿橫移如贄所云也一京營練兵全藉二三副將計營將所著聞者焦澤與素正耳當其充總兵也固以諸將之才皆出二將下令正雖老矣澤猶壯健乃置散地而諸副將中反多以怯懦者充之卒然應變何所恃賴且各營副將上既壓於提督下復同於叅遊紀律不明未有甚於此者不知有警之時亦用其衝鋒破敵否乎如其必用是平居無統御之權臨時受折衝之寄以素不服習之卒而驅之使戰其不格

明矣臣等謂自提督而視諸將則提督固為大將自副將而視諸將則副將即為大將似宜少伸其權以便節制至於各營之兵舊所謂戰兵家丁名色即係聽征之數即今是否精壯應否堪戰在提督諸臣當思操期在邇秋防在邇作何整頓務要兵識將意將識士情庶臨時不致倉皇又查各年防秋之始預取各處驍勇名將致之闕下以備緩急今其可已乎一賞不遺小則賞一人而千萬人勸昨者老營堡之獲保全朝廷之所賞賚

者鎮巡耳臣等以為鎮巡之功誠不可泯使非哨探者
先得其情則談堡之危尚未可知則此哨探者固曲突
徙薪之見也夫近年以來各邊墩卒直作敵諜在大同
大邊尤甚每賊欲入犯先遣精騎絕我哨探名曰巡邊
以故賊已入境尚無煙火及有傳報如老營者又不蒙
朝廷分寸之恩此何以勵人心而鼓諜者之氣今何不
查前老營哨探官軍厚加賞賚以後各邊如哨探得實
果符所言即於勘報疏內明敘其功以便陞賞至於巡

邊零賊作何撲滅大邊墩卒有無關繫在各該總督軍門隨宜裁酌施行亦伐敵謀審彼己之定計也一勘報邊臣功罪責在臺臣往有不待勘報先已題請賞罰及勘報至又多異同如舊歲福建之事使王言既出而復返固非事體必候勘報乃又延至三五月或一二年而後覈冊到者又非賞不踰時罰不後事之義臣等謂以後各邊少有烽煙凡該巡按衙門即便移駐近地詳覈各將進止虛實地方有無殘破俟賊既退限半月之內

即便具實奏聞庶該部藉此以便題覆朝廷據此以行
賞罰不惟欺隱之弊可革而有功即賞有罪即罰亦可
以勵三軍而作勇敢之氣一興師十萬日費千金今戶
部之所計慮者各邊年例耳一或有犯凡行糧犒賞之
類不可勝算且自去年以來水旱頻仍各省倉庫搜括
殆盡雖不蠲免豈無拖欠即今歲入之數安能常保如
故凡此皆其所當寒心者合勅戶部凡內而倉廩糧餉
草料務廣儲蓄外而邊鎮如山西之偏老大同之左右

等衛宣府之獨石懷來等城薊鎮之喜峯古北等口與
陝遼諸鎮凡繫屯兵堵截要地一應芻糧務先時預備
以使緩急足用更望皇上加意節省悉蠲不急之務幸
毋以軍儲大計置度外也一聲東擊西猾酋故智敵如
分道而南或以犯南山為名而直攻偏老或以犯山大
為聲而直趨薊昌者各該總督鎮巡一失機宜則捉襟
露肘勢可立見如昨老營遊擊劉滋方欲東援賊又西
至比及掣回而賊已去矣合飭宣大薊遼等鎮諸臣凡

一切應守應援事宜俱照節年條議遵行如賊西犯毋
借口東援以失外防而棄山大如賊東犯須酌量緩急
毋獨守一隅而置我兵於賊後至於薊遼昌保務據險
堵截使匹馬不敢南下萬一深入其策應之責尤視各
鎮為重陝西三邊自春以來套部亦往往擾我邊民責
令彼處鎮巡宣力揚威毋貽國家西顧之憂一近時霪
雨連旬都門之外陸地舟行閭閻舍墉十室九頽其在
邊境城堡牆濠又不知狼狽何狀竊聞大同城堡類低

薄特甚薊昌邊牆每依山湊砌即今坍倒誨寇不問可知合飭督撫諸臣亟為脩補凡鹽菜銀兩從便權宜工完從實開具奏奪務使牆堡堅完以資戰守亦今日邊防之不容已者再照軍國大計凡據各邊傳報該部不時奏聞臣等不時糾正然呼吸之間安危所繫少有遲留坐失機務查得成祖之於閭臣彭時孝宗之於兵部尚書劉大夏等一聞警報不時召問我皇上前歲一問石州之變而諸邊臣即有骨慄毛竦者況今日兵將不

及二帝時遠甚我皇上肯默居深嚴而不為天下軍民計哉伏願查復御便殿舊規俟秋防有警之日容閣部諸臣面議方畧諸臣中必有仰體聖心酌陳緊要事宜不敢以瑣屑細務瀆天聽者臣固知各邊諸臣必將曰我皇上之留意邊防如此其有不用命者乎伏惟聖明裁察臣等不勝祈望懇切之至

鄙詐督臣餽送無名乞賜懲究以正顏風疏

兵科

昨本月十二日該原任兩廣總督劉燾寓書於臣臣開函

見有禮帖一通內開金色段等物共代銀二十四兩臣
不勝駭異蓋燾與臣既非同鄉又無交好臣叨任今職
頗於督臣職掌相關燾在蒼梧經臣論列又在行勘之
中其當遠別嫌疑燾豈不知夫燾既為臣不滿臣必為
燾切恨無疑一旦改容加禮豈人情乎且銀至二十四
兩禮乎賄乎況自科臣丘橐叅論方廉以來其各該督
撫與臣等科道官不相通禮久矣燾乃以身作俑此其
譎詐不情之狀固燾所習為而不顧者蓋燾官已踰分

囊已不貲聲色縱逸之欲日所耽娛苟得一論劾而去
實其所甘心者以故假此無名之餽既欲汚臣以泄平
日忿恨之氣又欲激臣論列以遂自己偷安之心臣於
此非不知泯然麾卻不一宣騰則全渾厚大體若乃硜
硜自全冒昧上聞不惟自涉矯激抑且墮彼巧術妨國
家使過之仁臣之罪不可逃矣但臣言官也百司愆違
尚當糾正贓貨逼身又復隱忍恐世之效尤者且將曰
通賄如素亦不見罪言官如臣亦不糾舉使天下士習

日淪於貪鄙鑽刺而莫可救正者自臣與燾始矣故臣
寧受冒昧之名而願仕路之清明寧受太刻之誚而願
官常之肅整至於臣素無羔羊之節致來暮夜之金業
已愧死入地矣除聽罷斥外伏乞皇上勅下吏部再加
議擬將劉燾或據平生斥奪其官以清仕路或念秋防
在邇據此一節重加降罰以杜私交倘從此可以滌士
風而挽世道即臣之心不白於天下而謗怨罪謫交加
於臣臣亦無憾矣

敵人謀犯乞賜嚴飭內外當事諸臣大加防禦

以保萬全疏

兵科

昨該宣大總督王崇古薊遼總督譚綸各塘報西有俺
答黃台吉把都兒東有土蠻欲犯古北冷口宣大洪蔚
等處已該兵部題覆奉旨嚴責將領諸臣其京城內外
防守事宜又諭諸臣詳議來說臣等竊以為敵果入犯
薊鎮則據險堵截責在本鎮就急赴援責在宣大山保
昌遼鎮壓畿輔責在京營相機調度責在本兵臣等職

司糾正其於諸臣一有功則請行賞一失機宜則請行
罰似亦不必襲故套再行申明以滋紛議但俺答諸酋
自秋以來結聚邊外蓄謀日久既稱欲搶糧路城子又
稱欲犯古北等處在我當事諸臣自當萬分戒嚴竊見
內而京營諸臣本以二三之見遂成掣肘之勢即目寇
至尚且互相齟齬不聞一體相關之義古之人有先國
家之急而後私讐者況無上事而相持相沮萬一胡馬
近郊號令不一臣且不能為諸臣曲說矣外而薊鎮數

年訓練之功全在此舉一試今虛聲已傳塞外而諸酋遲遲不發固欲厚集其勢以抗我師使我徒有虛聲而無實用則臨陣交鋒之際尚有不可必者伏乞嚴飭京營提督薊遼總督鎮巡諸臣務要嚴加防禦同心體國毋恃其不來恃吾有以待之其在京營務廣集衆思懷同舟共濟之念如立營於外則互相犄角或以我為正而以彼為奇或以彼為正而以我為奇其併力於彼非為彼也彼之營固則我之營益固正所謂輔車唇齒義

也如未事而反面相濺臨事而觀望不顧縱倖免無虞而吳繼爵曹邦輔等之失不可掩也其在談鎮必多方哨探堅守所必攻之地預設所必勝之策果拒敵於外使匹馬不得南下則功當首論苟一入邊牆或設伏張疑或直衝其前或尾擊其後使進不敢震搖神京退不得飽欲完歸則功亦次論倘執一隅之見致有疎虞譚綸戚繼光等之責不可委也京東諸郡縣收歛保守之責既在有司當茲秋成亟宜收歛各歸城堡使敵野無

所獲則不得因糧於我自成坐困宜飭順天撫按速行
各該郡縣如敵壓境果設方畧堅守城堡俱依軍功陞
賞其怯懦無謀致有失陷者聽撫按據實叅究至於有
司入簾者公事畢宜令速回陞遷者新官至方許離任
不許因而推避自取罪責宣大山保諸臣已奉入援之
命自當以京陵為重然敵既垂涎洪蔚則撫臣以下宜
亦嚴加偵探毋令敵遂分道并擊之謀果敵止東犯使
力能搗其巢穴聽便宜揚威以攻彼所必救至於今日

急務尤莫切於賞罰二事然有師終之賞罰有臨時之賞罰師終之賞罰所以論既往之功罪臨時之賞罰足以鼓方張之銳氣除師終賞罰聽臣等本科及各該巡按候事定之日分別查究外其臨時賞罰如各該督撫自宜便宜行事惟外而入援兵馬內而守城官軍宜於行糧之外多備犒賞銀兩在通州昌平者即令部臣計算在京城者另委官員收支庶重賞之下必有勇敢至於不用命者俱照軍法行事已蒙欽命在當事諸臣着

實舉行之耳臣等不敢再贅

邊報日急再陳防禦事宜以保萬全疏

兵科

本日臣等據薊遼總督譚綸據石塘嶺叅將陳勛揭據家丁楊大旺等報稱潛出白海子迤北瞭見大舉敵兵約長七十里趕着牛羊祭了天於八月十二日起身往東北行走至十六日尾兒方纔走盡本日有遊賊三騎向墩密說黃台吉俺答都往東北去了只近新月兒上來進裏邊去要搶馬蘭古北東西地方又一股圍色

振兒搶獨石龍門就進黃花鎮往東一帶又說一股搶大東邊等因到臣臣等看得石塘嶺所報敵人欲一犯黃花一犯古北一犯馬蘭一犯大東邊先據東路節報土蠻亦欲分犯是東西二敵分為五道雖尚在邊外然深入之計已露情形而國家防禦之兵在薊鎮號一十三萬在京師號十萬其各援兵在宣大山西號二萬有餘在遼東保定山東南號五萬有餘通計不下三十餘萬而又我處其逸彼當其勞我環甲待戰彼越數千

百里而來兼以賊黨之中半吾赤子苟申吾招降殺敵之令則彼之黨散苟在我將帥人人思奮則俺把諸酋之首且可繫而致之闕下此在我皇上布恩威與中外將帥鼓舞三軍何如耳臣等待罪該科但恐賊以必勝為主而來我以未見賊之兵而怯則固不能無杞人之憂者謹以防禦未盡事宜為皇上陳之幸俯賜采納焉一慎擇衆議以止搖亂近邊報來凡各臣子人人切齒累上封章俱蒙皇上采納無非先事預防之意而各談

官民即涵涵驚擾萬一寇至而甲可乙否上下震動一則使本兵茫無定見一則使官軍漫無定守甚非安內攘外之計伏望皇上明斷於上當事臣工詳加裁酌不得一槩取必以滋紛擾至於各城居民在巡城御史多方曉諭與其驚惶而失措不若安靜以併守之為得也一驗試器械以求實用晁錯云器械不利以其卒予敵也竊惟京通二處合用弓箭盔甲神槍銃砲佛朗機火藥等項或朽壞不堪或日久未試即如火器臨時一不

堪用則衆皆束手矣請飭該部及巡視監甲科道官作速查驗前項器械應否堪用如不可恃務預先整理不得以費用之故而妨大計違者聽巡視并臣等指實叅究一慎守要害以遏敵勢查得薊鎮自庚戌以來敵往來直侵內地獨昔年總督楊博拒敵於外本之探報已真以故隨其所守皆與賊相值則我之所守者約而賊之所犯者昧矣今諸酋分道之謀雖真偽未定苟非預得其真情則賊將攻其所不守而我守其所不攻矣請

飭總督譚綸等耳目雖借屬夷哨探尤貴多方如敵直犯一路自可併力堵截倘果分道而南則我雖涉於無所不備而彼之勢亦分矣務要酌量緩急同心防禦使敵騎不敢南下雖無擒斬自准奇功萬一縱賊深入其責將誰歸哉一預支月糧以鼓軍心伏覩皇上軫念薊鎮軍士發銀犒賞內外軍民亡有不感激泣下以為皇上優恤之恩如此則敵人不足平也今營軍犒賞之典除候臨時請行外至於月糧類過期支領此在無事則

可即目併操既無繇別營生計一赴營壘不惟多內顧之私而數日行糧亦不能自辦矣請諭該部查各官軍於九月之糧即先放給則以所應得之物而給於所急用之時此蓋不加賞而自勸者一速傳的報以便防守蓋兵家之道耳目為先傳報不的非虛布軍馬以老我師則誤失機宜以致倉皇庚戌時薊州之信十日不得聞通州之信三日不得聞城外之信城內不得聞失在於探報之役差委未專耳請諭兵部凡薊鎮塘報與城

外走報各令分派的確使有專責少涉遲延致悞軍機
置之法毋宥一彈壓草澤以消姦謀山東河南之兵既
應赴援該省舊稱多盜乘機竊發本其故智先時防禦
勢不容已請飭河道提督軍務都御史及該省司道郡
縣官各照所部之地嚴行防範庶邪謀寢而內變不作
至於二省撫臣已奉入援之命即宜提兵境上俟有的
警星馳赴援不許逗遛自取罪責一併力重城以固外
防臣等竊以京師惟重城難守蓋城本低薄內多曠地

防守官兵又視重城為差異萬一難守關係非細請飭該部量添兵力壯丁仍乞蚤委文武大臣預先料理務使不可勝之勢在我而後京城之防守為益固凡此皆國家勝算之末技為諸臣條畫之所未暇及者臣等私憂過計偶有見聞不敢緘默伏惟裁酌施行幸甚

營制屢更統帥不一懇乞聖明亟賜裁定以正

事權疏

兵科

臣等竊惟京營之制始輔臣倡議意以為收兵權飭戎

務在分營選將既其說不可行於是遷就焉為益三大將已又益三文臣合之為六提督時科道官固力爭之乃以秋期至遂姑置不講今邊聲漸緩將領無統紀臣不得不竟其說蓋營制之壞失在於不擇將而添將不增軍而增官不講訓練而講營制易有之師或輿尸凶宋程頤以為軍旅之事任不專一則覆敗立至今奈何以一輔臣故而用三大將以一勲臣故而用三侯伯又以三侯伯故而用三文臣假令此六人皆才且賢然十

羊九牧之害臣等猶不能無慮況入秋以來一分布兵馬輒肆胸臆擇便利歷旬餘莫能定豈惟文與武不相為用而文臣中亦自相矛盾矣千把總號頭受叅遊令倏焉而副將之令至又倏焉而文提督之令至又倏焉而武提督之令至多指亂視多言亂聽即無事且不可況欲以臨敵乎各衛所官軍雜置三營中則此六提督者能無各衛所公移乎有之則一官而往來六提督之門者紛紛矣其費可不問而知也且三營各三副將將

將兵各五枝不可謂分乎分矣得其人則合之為三大營分之為六副將又合之為一總督一協理蓋祖用先帝之制而諸副將之分屬統領者又隆其權雖不用輔臣之言而分三為六合六為一者又於分數為甚明故臣等以為文武大統帥則莫如復先帝制便蓋今日所患者不在兵強而在兵弱不難於練三軍而難於將領得人昔人云有將則有兵今營將類庸懦昏昧與之談攻戰則口禁莫為應且行伍消耗視祖宗時不啻十之

三四乃日建議日添將日取中旨如兒戲者終歲無成
說其於兵政有分毫裨哉伏乞勅下兵部詳議上請毋
拘成說毋循私見果大將太多即革去四員遵照先帝
一文一武以司總協其諸副將各仍近議分統以後推
用將臣不拘某類但求知兵老練者充之至於補伍練
兵事宜俟議定更望皇上嚴飭當事臣工大破常套從
實振舉使數十年積弱之勢轉而為強臣等不勝願望
之至

懇乞聖明遵祖制慎贈典以重名器疏

兵科

昨該禮部題覆司禮監太監陳洪乞恩疏蒙聖旨是陳洪侍朕恭慎效有勤勞伊父准贈都督同知母一品夫人後不為例欽此臣等不勝駭異以為祖宗二百年贈官之制至今始變隨查大明會典凡武職有功封贈父母各照見授職事對品封贈無有贈內官父母為一品者先帝時太監溫祥得贈其母為一品夫人然越禮踰分已當議革而溫祥之父不得與封者以子為太監父

無封太監例耳詎意太監陳洪即因溫祥贈母而求并
贈其父已自無例可比矣而該部則曰贈官原比武職
事例豈以所引滕祥廕弟侄為贈官例乎且都督同知
與一品夫人皆極品爵也洪不過一五品內侍耳視對
品封贈之例既不相協而內臣之於武職又何相干涉
今天下武職多怠玩而不振者以爵賞不足為天下勸
耳使都督同知既可以無軍功而得則人何必蹈湯火
赴白刃視死如歸耶即有蹈湯火赴白刃視死如歸者

陛下其何贈以加之耶夫贈軍功與無軍功者同則人且不勸況有軍功者尚為品級拘未盡可得都督同知耶陛下即以洪為恭慎為有勤勞然蟒衣玉帶陛下之所以寵之者亦極矣洪果知恭慎其何忍以私親故而壞國家二百年之制陛下又何忍以宦官故而施此二百年未有之恩耶且此典果出陛下意乎抑因洪曲請而後與乎又因閣臣票議而後與乎果出洪曲請陛下直以祖宗之制問彼自當無詞以對若出陛下意則閣

臣當救正部臣當執奏今在廷諸臣皆知出閣臣票擬則其意不過以上下之情未通遂不得已為調和中外計耳夫陛下為天下臣民主不使閣臣直行其道而使不得已市恩中貴雖廢祖制壞名器而不顧臣等竊以為不可伏惟聖明裁察

屢據邊報乞賜嚴飭邊臣大加逐勦以戒不虞

并議處降人以全國體疏

兵科

據宣大總督王崇古揭報本月十二日敵酋黃台吉等

率衆一萬餘騎自弘賜堡石彥莊溝進入隨調宣府總兵官趙岢自左衛馳赴策應督發原調宣府副總兵官劉國東路叅將馬孔英西赴聚落探賊迎勦本日晚敵騎至城東二里東塘坡下營黃台吉遣一騎近城答話索要原降那吉等本日四更時原任總兵胡鎮督統叅將葛奈遊擊朱泚兵馬二枝在城東關外下營見從南來敵人二騎當令胡天福等活捉前來審一名土乎赤係大同通事一名啞都雅係番人稱說是黃台吉家人

差來往大同與把漢那吉說話未曾相見復問此來為何本番回稱止是要小官兒胡鎮等將本職連日傳示詞語若要那吉不當擁兵入犯見今調兵與你廝殺誰肯輕將那吉與你你若無禮就將那吉殺了與你看至五更時賊往東南行走胡鎮劉國馬孔英并叅將原于天追襲趙岢自萬全左衛趨許家莊十四日各官追奔地名自造堡賊撲來各官督軍齊用神火奮敵打死敵人數多就陣奪獲鈎杆一十二根十五日賊俱在許家

莊東南行走俱不開營又稱馬芳先西下朔州不及掣
回胡鎮回防適與敵遇其劉國馬孔英之兵既與血戰
胡鎮兵馬累與連營聞賊終夜驚擾若敵十五日果犯
該城地方趙岢已至自能追擊必回陽和天城大川北
遯已調叅將賈國忠楊爾干并標兵二枝及劉國馬孔
英之兵在天城等處伺候邀截敵連日野無所掠人馬
無食或可挫敵獲功其原遣立功官田世威帶通丁鮑
宗德等赴威遠一帶據本官報稱老酋差人至邊答話

世威備將朝廷恩威示各官收養伊孫之恩責令還搶
擄人口執送許為奏請天恩不殺其孫容伊納款議與
放回即差鮑宗德同原番直入敵營親見俺答一一承
許生死必欲見其孫子百凡俱當依從且死不甘心以
伊孫買賣諸逆對天發誓若與我孫情願一統天下每
年進馬三百匹永不犯邊又稱黃酋索降聞言啼哭其
犬羊之情本圖乘虛搶掠二鎮兵馬雲集到處扼堵大
遭挫折劉國一戰大砲打死敵兵人馬數多敵亦知懼

即時起營且敵素強悍必使見兵遭挫方可折其驕氣
堅其哀求又據宣府巡撫孟重塘報據總兵官趙岢報
稱十五日馳至地名驪田堡與賊對敵斬獲首級四顆
得獲敵馬敵器口袋不計其數賊即收營退避等因到
科臣等惟自那吉投降以來俺答屯結威平黃把深入
內地一欲乘間搶掠一欲強索降人據稱我兵雲集大
挫賊鋒果如所言則敵人強索之謀既寢其謂勢必北
遁是矣但地方有無殺鹵未經勘覈敵情叵測且又尚

在境內萬一東西共犯或揚兵塞外使我軍東奔西馳
無時休息或託言哀求使我緩備而陰為攻困之計其
該鎮督撫將領自當乘勝振威嚴為意外之防一有疎
虞其責不可辭矣至於俺答哀求納款一節此中國威
信之體外屬觀望之機俱在此一舉昨該兵部題覆處
置降人事宜蒙旨賜以官服且令該鎮官加意綏養俟
旨另用臣等以為事在邊疆自當聽彼展布且敵方入
寇豈容妄言予奪以褻國威近聞邊臣亦自以堅執不

與為非而又俺酋哀詞懇求則在我或予或否自當詳
議蓋中國之於外屬來則有備去則不追即諸酋之君
長降亦不過厚加賞賚以遣其歸不惟不可用而亦無
久養之理況那吉一小豎子彼舍之無關於盛衰我得
之不足為有無在俺答則必欲生還在中國則必欲養
用臣無論那吉久則必思颺去自是諸酋以索降來則
彼之師反有詞而堂堂中夏得一酋即欣然以為奇貨
而質之其自小也亦甚矣且強索而後與固示弱而失

予奪之權哀求而不與又不武而失廣大之體但敵既入邊須令收兵遠遁果情出哀懇不敢復犯邊疆然後宣布朝廷不殺之恩許令那吉生還其應否納款應否責令執送叛人或盡殺叛人合行確議必使吾中國之體不失乃為可耳至曰每歲獻馬三百則中國所重者信義耳又烏用彼馬為哉伏乞勅下兵部詳議上請嚴行宣大督撫鎮守等官賊未出邊務大奮軍威剋期逐勦以靖地方果彼哀求降人方許遵照欽依施行其敵

過地方有無殺掠及各官功罪仍行彼處巡按御史嚴勘徑奏則邊方不擾而國體可全矣

恪遵明旨查正公用銀兩疏

萬歷丁丑年時任光祿寺卿

近該吏部會同戶部題奉聖旨這事情既查勘明白方揚方抗王廷卿都降一級調外任用王廷卿所奏雖出私訐然倉庫錢糧不奉欽依擅充私用是何理法以前且不查究今後兩京各衙門都着一清查有相沿積弊着首舉釐正奏請定奪如怙終不行釐正及首舉不

盡的着兩京科道官訪實劾奏欽此欽遵為照本寺供
應上用膳羞及內外飯食筵宴除正項外一應雇覓搬
運扛役及公堂廳署費用查刷揭帖修補房竈等項頭
緒甚多俱於庫貯麻連蒲包房租等銀內預赴科道掛
號支用獨糟價及年久麪末與各署餘剩物料等銀向
收廳庫每年約二百兩不等陸續幫貼良醞署腳價器
具及修補房竈等項相沿支用雖係公費未奉欽依終
屬未安今蒙皇上諭各衙門首舉釐正臣等逐一清查

盡數首正凡臣等先已革過及今次應存數目相應開立前件上請恭候命下本寺查照後開款目置木牌懸于堂壁仍置立文簿二扇一存本寺掌印官備照一付典簿廳查照遵行其糟價及剩各項銀兩不論多寡同麻連等銀俱收入堂庫凡應用銀兩悉照後開額數赴巡視科道掛號方准支用如有未盡入庫及額外冒支私用許巡視科道指實叅劾伏乞聖裁

計開

一各署雇覓搬運扛役每年掛號用銀四百兩

一查刷道書手工食每年掛號用銀五十兩四錢

前件臣等查得扛役銀四百兩每年俱支庫貯麻連等銀今前項銀兩庫貯不多臣等自本年正月以來裁減冗役八十餘名又有禮部新補厨役足充搬運扛役今歲已終俱未支銀雇覓似應立為定規以後不許再支庫銀致令難繼先據查刷本寺湖廣道唐御史手本開稱本道書手既係食糧厨役又相沿支領工食甚屬冗

費所有公食銀五十兩四錢相應裁革以上二項應盡
革銀四百五十兩四錢伏乞聖裁

一本寺堂上官到任離任案衣公宴筆墨印硃習儀監
宰陪祀供事上陵賃房擺飯及科道進寺收放錢糧擺
飯各衙文移紙劄丁憂病故官吏奠儀棺木等項每年
共掛號額支銀二百兩

一廳署官三十八員到任離任每年掛號支銀約六十
兩

一查刷道造御覽揭帖每月各役食用銀三兩寫帖工費及裝綾殼等項共掛號銀五兩八錢五分

前件臣等本堂公費銀二百兩今歲已終止用過一百五十兩尚餘五十兩相應量減四十兩每年議留銀一百六十兩廳署官公費減去二十五兩止留三十五兩以充前項費用先據查刷本寺湖廣道唐御史手本開稱查刷進呈御覽工費每月八兩八錢五分相沿似多合每月工費減銀二兩五分每年共減銀二十四兩六

錢以上三項共量減銀八十九兩六錢伏乞聖裁

一每月成造進膳本匣鎖鑰等項并修補本寺房垣爐竈每年未掛號約用銀七十兩不等

一良醞署米麴腳價及治辦造酒器具每年未掛號約用銀六十兩不等

前件臣等查得本寺及器皿運柴各廠每遇大修俱題請行工部修理其各廠不時修補原赴科道掛號動支各照舊獨本寺各署及各倉房不時修補及每月膳本匣

鎖及良醞署器具脚價委不容已相沿俱支糟價及餘
剩料銀今議糟價等銀俱入堂庫掛號支用見今積餘
銀一百四十七兩即交庫內以後續收前項銀責令典
簿廳置立號簿凡登號前銀每月即令各行赴庫上銀
前項應用銀一百三十兩俱於科道掛號支用伏乞聖
裁

一行各衙文移并回部實收每年用湖廣呈文紙銀九
兩六錢土地祠香燭年終封印門神鶴鹿食用銀八兩

九錢本寺堂廳署每年用刑具銀二兩八錢其鄉少卿
寺丞到任離任公宴案衣及雨具扇傘更換坐褥齋宿
油燭燈籠難以預定以上各項每年共掛號額支銀二
百兩

清查供應器皿酌處成造以節財用疏

光祿

據大官等署署正林及祖方岱蘇大生楊鉉等申稱蒙
本寺清查各庫器皿若干合行造辦若干逐一開報以
憑酌處成造依奉會同管器皿庫署丞侯于魯張天相

王堯相許成材查得四署年例兩京器皿共該一萬件
今大官珍羞良醞三署各有餘積今會萬歷七年分器
皿通應量減大官署見在器皿三千三十件合量會工
部四百件南京一百件珍羞署見在器皿共四千五百
二十四件合量會工部二千二百九十五件南京四百
件良醞署見在器皿三千三百七十五件合量會工部
四百件外檯酒損架各四百五十條件掌醢署器皿供
應獨多雖有見在二千六十四件仍應照舊造二千三

百八十三件南京造一千件又查得黃絹袂除用過回銷污壞不堪外見在一萬四千六百五十四條黃絲絨繩一萬六千四百一條黃綿繩七千六百四十條錫器見在及追回各處侵占共一萬九千六百八十八觔十兩遞年常例并續添等項供應每歲約用黃絹袂黃絲繩各三千條今以庫貯見在并新收兩京年例之數計之可供六年之用其錫器內每年兩京成造隨卓錫湯鼓查歷年以來並無支用每遇茶飯筵宴合用器皿又

將錫鼓改造用畢還庫徒糜原造工費又查得工部廠
隨盒小袱又黃絨繩歷年以來亦無支用見今堆積相
應酌處各等因具申到寺臣等查得萬歷七年分各項
供應器皿既經各官量減其應用六千九百七十八件
合照例成造至於工部廠隨盒小袱及黃絨繩與兩京
隨卓錫湯鼓既不支用本寺以後會計俱免開造其黃
絹袱黃絨繩見在既足六年之用合暫停止俟三年後
如恐不敷預行題請錫器見在及追回各處侵占一萬

九千觔有餘若歲歲清查即有折損能費幾何萬一數年之後果不足用再行會計錫料送寺隨宜成造應用器皿庶免重複工費或于財用未必無少省矣

重宴賜以撫遠人疏

光祿

近該禮部題處給賜夷人奉聖旨併及宴賞酒飯着臣等本寺選委署官清查管理臣等仰見皇上體念遠人恩至渥矣除即選委廉幹署官逐一清查凡筵宴下程務令鮮潔足數外但夷人嗜好不同內多不食猪米等

物每給下程多求折價或求換給生羊臣等以未奉欽
依不敢擅折間易以羊即色喜謂得實用而所得本色
下程又託鋪戶人等轉易別物既難望如原價又難保
無侵漁雖有實費徒潤狡猾深于夷情未便合無比照
近來賚予改給衣物事例凡各夷到京令通事譯審應
得下程除願本色照舊給送外其願折價或願生羊詳
具手本送臣本寺照依時估改給至于午門外酒飯桌
席治辦雖屬本寺收送卓席係各邊伴送員役及會同

館館夫往往攘為己物非本寺所得禁治以后遇宴如
各夷職官及跟隨人役願親收者不許各員役干預其
餘如朝鮮等國職官每桌立一單票明開件數觔兩預
令館夫報名填票交送如有剋減嚴加究治仍行錦衣
衛責令護宴校尉驅逐閑人不許擁觀乘機混搶庶朝
廷恩禮不為虛文而夷情甚順將益動其來王之誠矣
懇乞聖明勉留大臣以正人心以全國體疏

甲申

時任大
理寺卿

近該吏部尚書楊巍覆議御史丁此呂䟽其詞稍激以致給事中王士性御史江東之等交章論巍且及輔臣申時行與巍累䟽求去輔臣許國侍郎陸光祖等亦有激求去一時在廷諸臣人人駭異幸賴皇上洞燭屢下溫旨勉留二輔臣與巍及令光祖安心供職二輔臣素明臣子委身大義必不忍再萌去志諸臣聞之色喜謂我皇上知人之明真同日月獨巍求去之念未已臣願皇上以大義留之蓋大臣與庶官不同庶官無大責任

猶可輕去以報國之日長也大臣受國家數十年高厚之恩其進退係賢不肖觀望其既退欲復報恩無繇而以一二少年之言為潔身自全之計非大臣所宜爾也巍之居家孝讓立朝公正皇上知之中外之臣知之即論巍者無他過可指亦心知之而必欲罷巍因使諸大臣不安其位將令言官受一網打盡之惡名亦非言官所宜爾也臣無論言官用意公私竊念吏部以進退百官為職掌請旨調一御史而必求罷一尚書抵之投鼠


不知忌器於國體士風闕繫不淺況人才難得老成人尤難得臣不願當我皇上極聖至明之時而有輕棄老成令諸大臣解體之過舉也又不願使九州四夷聞之疑朝廷舉錯失當或嘆息或歸咎建言者之不忠也伏乞皇上再降溫旨以大義勉留楊巍令與諸輔臣協心輔治庶人心可正國體可全臣無任懇切祈望之至

自陳乞斥以弭天變疏

大理

近該廣西道試監察御史朱璉星變陳言該吏部都察

院會題節奉聖旨是四品以上京堂官俱着自陳欽此
臣係四品例應自陳臣繇嘉靖四十四年進士歷知縣
給事中左右給事中都給事左右叅政太僕寺少卿
提督四夷館太常寺少卿陞今職伏念臣質本庸愚才
更踈淺官縣令愧無牧愛之聲叨省垣徒負建言之責
兩叅藩政旬宣無能三歷清班瘵曠是懼伏乞勅下該
部將臣即議罷斥庶倖位者去而仕路以清其於天變
或可少弭矣



溫恭毅集卷二

欽定四庫全書

集部
溫恭毅集卷三

詳校官監察御史臣周元良

侍讀臣孫球覆勘

覆校官中書臣王慶長

校對官中書臣吳甸華

謄錄監生臣黃佑

欽定四庫全書

溫恭毅集卷三

明 溫純 撰

疏

忠臣已褒外親未有懇乞聖恩推廣明詔大慰

忠靈以培聖代綱常疏

甲申時任督撫浙江
兵部右侍郎兼都察

院右僉
都御史

卷查先准兵部咨該廣東道監察御史屠叔方題前事

本部覆奉欽依咨行各撫按官通行司府州縣衛所弔
取節年軍冊備查革除年間被罪諸臣除齊泰黃子澄
外其方孝孺等連累發遣親故不拘見在死絕遵奉明
旨務查世代遠近接輩來歷明白的確開具奏免以廣
皇仁內有族黨親戚墳宅資產久在戍所者若一槩遷
移回籍於人情恐有不堪合聽其自便願回者給與免
帖放回不願回者給與免帖仍在戍所附入民籍隨住
該衛即將冊內軍名削除不許復行勾提本部仍載入

考成簿內通限本年十二月終奏報如原無應宥人數
查實咨部不得輕信流移奸人妄告混免等因備咨前
撫臣蕭准經案行浙江布政使司轉行各清軍守巡海
兵等道及各府州縣衛所逐一查議呈詳以憑具題去
後未報該臣接管催據該司呈稱依奉行據杭湖紹金
衢嚴處七府各回稱所屬州縣衛所並無革除年間被
罪諸臣方孝孺等連累發遣親故無從開報各具印結
繳覆在卷又據嘉興府申稱平湖崇德海鹽嘉善四縣

海寧嘉興二衛所並無前項累遣親故止據嘉興縣申
開應宥軍人吳阿真秀水縣申開軍人朱慶員等雖無
明書方孝孺事蹟而有奸惡外親字樣范小孫等係忠
臣方孝孺株連楊任外親累遣桐鄉縣申開軍人仲阿
添等事亦因革除年間忠臣方孝孺株連楊任外親牽
累發遣俱各有據均應一體申豁等因又據寧波府申
稱鄞慈定象四縣寧定昌三衛所俱無前項累遣親故
外據奉化縣申開忠臣戴德彝累遣軍人屠叔保并戶

絕軍人楊佛童等擬合轉申豁免等因又據台州府申
稱黃巖天台二縣并台州衛左右中前水軍等所松門
衛左右中前楚隘等所海門衛外屬前新桃健等所各
無應宥軍人其臨海太平仙居寧海四縣台州衛後所
松門衛後所海門衛左右中等所各造忠臣方孝孺王
叔英鄭恕累遣軍人陳景原等文冊到府理合申詳豁
免等因又據温州府申稱永樂平泰四縣溫金盤三衛
海瑞平等所各無前項累遣應宥軍人止據瑞安縣申

開忠臣卓敬累遣軍人徐亞生等到府合行轉申遵例
矜豁等因及准清軍守巡海兵等道各咨覆到司該本
司左布政使衷貞吉右布政使余一龍查得原題止稱
革除年間被罪諸臣方孝孺等並未開有諸臣細名今
據各府造到冊內有忠臣戴德彝王叔英鄭恕卓敬累
遣親故隨查得先為仰遵明詔查錄遺忠以彰聖政事
該巡按浙江監察御史蕭具題革除年間被罪諸臣方
孝孺陳性善戴德彝卓敬劉璟鄭恕鄭華王叔英程本

立盧原質龔泰盧迥一十二人俱經禮部覆查遵奉欽
依褒表備行撫按二院轉行本司於省城總建一祠春
秋致祭訖為照戴德彝等既與方孝孺俱係已褒忠臣
則凡累遣親故通應一體推恩矜宥但有祖充軍役繼
復累遣而調併別衛者雖應宥其後衛軍役而原係軍
籍隨衛安居多年似不必更張生擾至如原籍有丁盡
而戶存及丁盡而戶絕者均應照例開豁再照嘉興府
申送嘉興等縣冊開有方孝孺株連忠臣楊任致累伊

外親范小孫等遣戍雖范小孫等非方孝孺親故而遣
戍實繇方孝孺波及亦應併免今將各府縣衛所查過
累遣軍人姓名來歷分款造冊見在呈乞本部院再加
查覈俯賜會議題請施行等因到臣據此該臣會同巡
按浙江監察御史范議照捐軀盡節人臣殉國之忠褒
往勸來聖王礪世之典革除年間被罪諸臣方孝孺等
節蒙累朝褒崇恤錄所以振綱常表節義者誠千載之
一時矣但諸臣外親族屬連累發遣者尚未矜復似猶

未足以普聖澤而慰忠魂也茲者仰荷皇上俯納部院
諸臣之言特旨查豁綸音一下非惟株連蔓繫久戍窮
囚喜得更生之幸而凡率土臣民莫不舉手加額感激
鼓舞共思殫忠畢義報效於明時矣臣等仰承德意敢
不竭力清查以期對揚於萬一今行據該司呈報前來
臣等逐一細加查覈除祖充軍後繼復累遣調併一衛
者照舊軍籍隨住不必更動生擾外其方孝孺戴德彞
王叔英鄭恕卓敬諸臣累遣親故見在伍供役者似應

悉從矜宥以霑浩蕩之恩原籍丁盡戶存戶絕者均應
遵例開豁以免勾擾之害至如方孝孺連累楊任併累
伊外親發遣者雖非孝孺親故而實繇孝孺殃及亦應
併請宥豁以弘一視之仁據呈查議的確委無詐冒奸
弊相應具題伏乞勅下該部再加查議覆請將革除年
間被罪諸臣方孝孺等累遣親故見在着伍吳阿真等
八十二名連累楊任外親范小孫等十一名併丁盡戶
存戶絕朱阿定等六百九十一名通行本省各該府縣

衛所盡行宥免願回者給與免帖不願回者亦給免帖
仍在戍所附入民籍當差該衛削除軍名不許復行勾
擾仍督行外省直衛所遵照但有營丁在衛者一體查
明豁免開除施行庶聖恩廣施忠魂永慰不惟雪彼時
株蔓之冤亦且扶萬世綱常之重矣

議留緊要將官以重海防疏

督撫

臣近接邸報見兵部推分守寧紹叅將盧述調補四川
松潘薊鎮中路遊擊朱先陞補寧紹叅將又接邸報該

本部題留朱先仍在薊鎮中路推中路遊擊任弘道改調署寧紹叅將事俱經題奉欽依訖該臣會同巡按浙江監察御史王議照分守寧紹叅將盧述駐劄舟山統督水陸官兵控轄沿海衛所軍務繁劇本官在任以來謀勇兼資恩威並用恤邊困而苞苴無染遇警報而矢石親撓先據定昌等營衛兵軍胡亮等俱稱本官愛士卒如嬰兒甘儉素如寒士惟恐任轉他省有失怙恃節經具狀願留加銜久任等情臣正執行司道查議呈報

間不意忽調前職又據定昌等衛所官軍李環等連名
告留情詞懇切臣當即一面牌行本官遵奉交代近例
照舊管事外臣等竊惟浙省海防寧紹實居上游而定
海最為首衝叅將所轄四區而駐劄舟山者孤懸海島
之中與各叅腹裏近海者不同非慣習風濤素協軍旅
之望者未易勝任今盧述一官七載久任多勞觀其合
詞懇留可徵輿情胥戴况近據被擄人口回稱倭夷旱
荒四年造船意圖入犯搶劫今歲隄備事宜視往年更

宜加慎目今大汎屆期一切選練兵卒繕飭船器分布
哨道控扼險要等務本官見任料理出洋蒙改松潘原
非陞轉其後代者萬一海波未習再議更調非惟人心
失望抑恐地方有虞臣等質之司道察之行間輿論與
近日海上傳聞倭情皆以留叅將盧述為便輒敢冒昧
具題伏乞皇上俯念邊海重地汎期正臨勅下兵部查
議覆請將叅將盧述照舊留任或念任久量加副總兵
職銜照舊管事地方幸甚

乞賜議處佐貳首領官員以風厲吏治疏

督撫

臣在先帝時叨任戶科給事中條議各省直州縣佐貳
首領賢者另疏薦舉該吏部覆奉欽依其後山東撫按
疏舉吏員縣佐趙蛟楊果遂成良令而各省亦相繼遵
行為例各佐貳首領官慶一時破格之遇未必無感激
思奮者但臣建白初意原為科貢之外例貢吏承貳途
拘於資格即有賢能如先臣况鍾之能為名知府者亦
無由自拔且以佐貳首領所管清軍水利徵糧巡捕諸

務無日不與相關得其人則閭閻省追呼之擾不得其人則苛瑣需求但視錢貨多寡為處分輕重其受害者更係貧弱小民故臣當時有此論列今行之既久多以各官難保其終即有與民相安者亦不敢輒舉一省中佐貳首領何止二三百人乃所薦舉寥寥二三人耳各官知難與二三人中也始甘心敗矣下官既甘心于敗上官不得不戒與逐夫戒與逐而可以風厲各官使改心易慮乎祇見戒逐愈煩敗者愈衆是戒逐止足以速

其貪而貪者又不可盡戒與逐也於是容隱之弊滋而苟且之政多矣以臣愚見必大為鼓舞導以為善之利而又使之不得不為善其州縣佐貳及三司府衛首領賢能著者不拘舉貢吏承照舊循例薦舉果係多才之地仍增益其數若有與地方相安不能盡舉者仍聽督撫與各差御史歲終或復命及地方緊要員缺具咨揭薦舉該部酌量本省相應員缺次第遷轉在各官事體風俗易於諳曉有熟路之便不得薦於疏者或得薦于

咨揭其途既廣其趨自衆是導之以為善之利也歷官
本省無勉強粉飾於此乘便改節於彼之弊是使之不
得不為善也且往時陞任誰能不用里甲夫馬迎送而
今可省矣或者以各省地方善不善為詞而一省中亦
有善不善況風厲各官以上進之路尤不當論地方善
不善以先啓其私便之圖其各官舉後或有改節即今
日薦舉明日論劾斥逐尤足以見無成心而不得以各
官改節過責舉者庶此法可以久行是於就近遷轉之

中寓久任責成之意化苟且見小之念為感激圖報之忠使閭閻小民盡受其澤亦熙朝一盛事也伏乞勅下吏部酌議施行

懇乞天恩俯賜議處漕糧以蘇運務以拯民困

疏
督撫

據浙江布政使司督理糧儲漕務道右叅政王應乾呈稱本省淺船歲派民七料銀三萬一千三百餘兩去年造船六百五十七隻該工料銀六萬七千六百餘兩除

歲派外餘欠尚多若明年全運本色再造新船必如前數方足額用船料萬分無措乞賜議處改折免致缺船臨期誤事等因該臣執行該司查議通詳間又為懇恩永蘇民困事准戶部咨開據杭州府新城於潛昌化三縣糧長章通茂等狀稱三縣山僻舟楫不通運米艱難向係徵銀解司給領買米牙保勒索運軍刁詐盡遭塗炭乞將三縣糧米改折解淮抵嘉湖之三六二府出米兌運代三縣之漕糧等情到部咨煩查三縣兌運果為

民累審據衆論相同即准改折回咨定奪坐派等因又經臣案行該司查議明妥詳報去後今據左布政使衷貞吉右布政使余一龍呈稱行准糧儲漕務道咨議及據杭嘉湖三府州縣各掌印官逐一查處明悉申覆到司轉呈到臣據此該臣會同巡按監察御史王世揚議照該浙省財賦凡起解本折輸納京邊視他省獨多邇來災傷頻仍織造繁數兼以兵民二變致閭閻蕭條庫藏空虛小民以逋負之故日困一日臣等受事以來除

督責各屬及時催徵外查得本省漕糧正改兌六十三萬石額派杭嘉湖三府係干軍國大計豈敢輕議改折但明歲船料無從處辦臣等反覆思維念太倉之米頗有贏餘若暫量改折色解部似亦計之便者至於新城於潛昌化委係山僻小縣去水次甚遠糧運果費多大為民累尤以改折為便既經該司查議前來故敢列款冒昧具題伏乞勅下該部查議如果臣等所言不謬速為覆請允行國計幸甚地方幸甚

一議改折分數銀數據該司呈稱浙省杭嘉湖三府歲辦正兌六十萬石改兌三萬石每年全運該淺船壹千九百九十九隻額徵民七銀三萬一千三百餘兩軍三銀係減存運軍月糧內扣抵去歲因先是料銀缺乏修造失時併造新船六百五十七隻每隻該工料銀壹百三兩共該銀六萬七千六百餘兩除民七銀外餘欠尚多見在議處若明年全運應再造船六百有餘既難加派小民又無運軍減存月糧可抵船料委難措處合無

將萬歷十三年漕糧暫改十分之三銀數每石照萬歷十一年戶部題奉欽依正兌六錢改兌五錢等因到臣臣等竊照節年漕糧遇恩詔或地方災傷方行改折為便民也乃往往既改之後反稱不便或必欲仍運本色此何以故以今日江南米價視往時大不相若也蓋往時米不甚賤今兵餉徵銀州縣一切差徭亦以條鞭法徵銀則用銀多矣用銀多則米不得不賤不惟豐年即少收穫亦不得不賤米賤則農家困當此米賤農困之

時而折銀仍照舊數無怪乎改折之法行之昔日則便行之今日則不便也除將差徭應免徵銀者行令給票兌支外倘蒙將萬歷十三年漕糧兌改十分之三每石連席板耗脚輕齎正兌折銀六錢改兌五錢以今日每石三錢時價計之亦祇得其平耳而其利乃在國用其省乃在本省免船料行糧之費也況米貯過五年則腐爛不可食即多改數年不為害若以後倉米果不足五六年用即令全運本色亦未晚也伏候聖裁

一議免徵改折行糧臣等查得漕糧單例每淺船一隻
運正米三百三十石用旗軍一十一名每名給行糧三
石三府改折十分之三計米一十八萬九千石約省運
軍六千三百名行糧一萬八千九百石往遇改折復徵
行糧解部以是小民苦稱不便今查行糧原為運軍遠
出於三府州縣計畝派徵倘糧准改折仍將本年減存
運軍行糧免令徵解是三府改折之銀雖止合時值平
價而行糧之免每石可省銀五分則蒙實惠矣東南賦

重役繁之地我皇上或不吝此五分之利使百姓不蒙
寬一分之賜也伏候聖裁

一議山縣全准改折臣等看得杭州府屬新城於潛昌
化三縣僻居山谷舟楫不通轉運甚難向係徵銀解司
臨期給令買米交兌市河牙保難免索勒且無倉厰租
國民居多致浥爛委為民累所據糧里章通茂等告詞
果出通縣公議但各役欲將本縣正米通改全折抵減
嘉湖二府隨糧三六銀兩二府代運三縣糧米一節在

三縣固為利益設遇荒歉嘉湖未必樂從恐難經久查
新城縣正兌米一千九百五十石於潛縣一千六百石
昌化縣一千一百石總僅四千六百有奇合無准於本
省本色內照數永令改派折色十三年分仍照前議正
兌一石折銀六錢改兌一石折銀五錢以後年分正兌
一石七錢改兌六錢著為定規其減存運軍行糧永免
徵解庶山僻小民歲免轉運之苦永荷更生之慶矣伏
候聖裁

一議改折臨時酌請臣等看得歲時有豐歉而米價之貴賤因之歲豐米賤則輸米易辦銀難若預令折色則求為本色而不可得歲荒米貴則輸米難辦銀易若預定本色則求為折色而不可得以國家大計生民膏脂所供而不求一通融便計恐民病而國亦不能不病今莫如查太倉米果僅足用誠難輕議如有贏餘於十分中以七分為不易本色以三分行各有漕糧省直除豐熟仍運本色外如遇水旱災傷及別項事故即於本年

八月以前奏報將三分改折照時價請定銀數行糧應否免徵則災傷事故在本年寬恤亦在本年不必發倉不損國計小民即蒙實惠若應再行寬恤不妨續議計無便於此者伏候聖裁

地方異常水災疏

督撫

據浙江布政使司呈稱奉臣批據杭州府申據富陽縣申稱本縣城臨大江自五月十六日起至二十一日止霖雨如注江水湧漲與城堞相連居民廬舍悉皆漂溺

悲號滿路預備倉穀俱被浸沒新城縣申據本縣太平
等鄉民周珍等產居港口田地沿江一帶極低土宜早
禾苦力種耘正秀何期連久霪雨洪水汎淹半月勢極
滔天棲房衝壞老幼悲號近見水退田成白土苗根爛
盡民命何生懇天憐救紹興府申據山會二縣居民馮
亮等告稱五月十八日至二十三日大雨如傾晝夜不
息又值衢嚴水發衝壞麻溪等壩水長丈餘漂沒民居
高低田地禾苗盡皆渰腐國課民命兩無倚賴蕭山縣

申稱五月十六等日暴雨連數晝夜山洪驟至江海交
擊水頭高於堤岸者數十尺塘脚坍於風浪者百餘丈
一瀉莫禦廬舍半浮田畝俱沒且今衙署城垣隨處傾
倒司宇禁牆半行頽壞事勢難支上虞餘姚諸暨新昌
嵎縣俱申報非常水災相同嚴州府申據桐廬縣申稱
五月中旬天降大雨直至十八日夜半陡然高浪滔天
民居淪溺縣堂水幾丈餘官吏衙舍獄禁分司儒學驛
房浸沒殆盡建德縣申稱五月十七日梅雨連綿至十

九日洪水泛濫湧入城內官民衙舍盡皆淹沒分水縣
申稱五月十六日至二十三日梅雨不止洪水驟發本
縣六鄉兩邊俱山中流大溪田地附山傍水形勢迅急
今遇水災圩岸推倒民田衝坍將半禾稻遍填沙礫居
民淹沒房屋飄流哭聲震天淳安遂安壽昌三縣及嚴
州守禦千戶所各報地方并屯田水災相同各等因俱
經奉批仰布政司會勘呈詳該本司看得杭紹嚴三府
各縣俱於本年五月中旬各被異常水災田廬漂沒禾

苗渰腐小民委不堪命已經通行守巡該道勘議但今六月上旬若候勘覆至日轉報恐致愆期請乞本部院先行奏報仍行駐劄該道委官再加勘議分數的確或蠲或賑另行呈詳等因到臣據此該臣看得杭州府屬富陽新城二縣紹興府屬八縣嚴州府屬六縣或僻阻山谷或逼臨江海地窄民稠生理鮮薄必得雨暘時若庶幾收成可望民生獲寧不意今歲五月十六至二十三等日霪雨連綿不止上而山溪洪水泛漲下而江海

潮汝衝湧以致城垣室廬多被漂蕩禾苗沒水日久盡
皆腐死即今遠地求秧不可多得即得又恐烈日難成
今歲秋成終屬失望頃者京畿旱災恭遇皇上徒步祈
禱布袍齋心前後頒布聖諭寬宥抑蠲逋賦及嚴戒有
司實心愛民臣待罪地方捧讀感泣正與各屬飭勵遵
行以求仰副皇上畏天保民之治乃三府各縣復遭此
異常水災實臣奉職無狀所致除痛自修省及督行布
政司會同守巡道將被災各縣委官踏勘分別某里某

戶田地若干被災幾分查勘的確另議蠲賑外伏乞勅下戶部照舊行事例巡按御史再行覆實具奏施行

府官不簡物議昭彰乞賜議處以肅吏治疏

督撫

臣惟國家欲肅吏治以安民生在慎選守令而守尤急以一方表率之責於守焉繫也臣自入浙以來於諸郡守責望尤切不謂素以才稱如金華府知府張守約者怨議叢生臣安敢不據實上陳謹按守約故激切急於進用而才力實能為且經挫抑或知懲艾固不逆其守

不可信也守金華二年間斷敏速條畫多可行臣亦心
器之而以同年故未有以不簡狀報者久之有云取與
太濫臣猶謂其或急進用心使之也明為本官言冀令
改圖已閱開報寮屬考語有貪肆通判楊萬言照磨陸
經典史高起鳳者皆註美詞始疑之而猶謂其或襲近
時郡守槩稱寮屬之浮套也博訪則知楊萬言及諸佐
貳委署印信及遇生日節令皆有餽送高起鳳以餽送
多故橫甚比臣與巡按王御史拏問萬言而始補送貪

縱事實何以掩前日縱惡之咎也提學副使林偕春被劾人歸罪本官曰本官之引拔童生盧鴻記等皆以賄及不盡允則艱然託故不為禮惡吏徐應星稱送本官以訪察詐富民張十八馮聖五十四等銀各以百計又以盜情詐蘭谿富民倪十八等銀亦各以百計安得曰盡吏受之有白金衢來者道本官家眷回籍行李充斥察其所得非錢糧多加兌頭詞訟多問有力稍有力則取鋪行段絹貨物不給價值方今聖明在上屢因旱災

詔臣等撫按官糾察有司不許徇情容縱又用臺臣言
特重郡守而郡守中有臣若此欲望寮屬不相效尤以
共成約已愛民之政難矣臣非不念同年私好而迫於
公議安敢復徇情容縱不遵奉詔旨不為地方計也叅
照金華府知府張守約才雖可以集事守不足以服人
始以欲進之心遂亡在得之戒私植桃李且以賄聞公
受餽遺惟為囊計訪察欲以懲惡而反害及富民盜賊
豈容妄攀而乃擾及善類寮屬無所懼而敢於為惡聞

閭何所恃而得以安生所當亟行議處以儆官邪者也
伏乞勅下吏部再加查訪如果臣言不謬將張守約照
不謹例開住員缺推擇賢能者代之使一方表率得人
而吏治庶可興矣

縣官馭下太踈致招訐訟乞賜議處以飭吏治

疏 督撫

臣竊惟縣令最為親民欲民安在責成縣令而縣亦有
難治如處州松陽僻居山中其民頑梗多豪舉持縣官

短長前令多以告訐敗去以是上官稍右民懼難為令
稍右令懼難為民而其實為令者或先以頑梗逆民而
純用法或即以脂韋廢事而甘善敗松陽之不治大率
坐此知縣程子課初政振作亦有善狀其後乃以謬戾
聞本年三月中巡按御史王世揚准生員李應科訐告
本官行分守溫處道右叅政胡緒究審臣亦牌行叅政
胡緒查勘虛實續據該道招解前來大約謂李應科祇
因爭山起釁遂爾誣告行私中間贓跡除無影者不論

外即有一二可指又皆吏胥葉以榮等所為其實本官並無沾染獨追徵無序作為太驟以致人心已失後效難期相應酌議別用等因該臣看得本官物議大著告有多贓恐多未究之情就經批行按察司再問詳報隨據該司按察使馮時雨呈稱覆審無異應照原擬發落等因到臣除批本官暫令還職及玩法誣告各犯查照律例遣配外該臣謹會同巡按監察御史王世揚議照知縣程子課法令雖稱敢為催科全無撫字民之不堪

其操切也已有日矣奈何又偏信吏書葉以榮等五六人大肆鴟張公開騙局則亦何以解百姓之疑哉然則應科之告固應科之刁而以頑梗逆民以脂韋縱吏亦本官自有以取之也第再三行勘委無入己之賊脫因人言遽使終棄不惟本官之抱屈可憫將使該縣頑梗之習益長亦非所以為一縣計也臣竊以為官體民風似當俱重乞勅吏部查議覆請將程子課照不及例降用惟復念其守未縱肆姑以原官量調簡僻則本官之

罪既足以示懲而後來者亦不至沮喪矣

懇乞聖明久任賢能府正官員以安民生疏

督撫

據浙江布政使司呈稱奉臣等案驗准都察院咨該本院題奉欽依責成各撫按官用心督察有司尤重各守巡道與府正官等因行司查議呈報依奉備行守巡各道查訪去後隨准杭嘉湖守巡道左叅政林喬相副使陳用賓手本俱稱嘉興府知府龔勉以先令嘉興熟知地方民情土俗故注措悉中肯綮入任三年以來敦崇

節愛盡革府縣弊政尤先教化即今令行禁止閭閻安
生樂業士類日益蔚起乞賜議加服俸久任以為屬縣
表率等因各到司該左布政使衷貞吉右布政使余一
龍會同按察司按察使馮時雨看得知府龔勉本英明
仁恕之心敷正大和平之政寬黎庶而里甲免借辦之
煩振青衿而黌宮有興起之效三年報績士民咸赴省
而攀依一聞議留郡邑並舉手而稱慶既經二道會議
相同復叅與論歸向協一呈乞本部院會議具題量加

服俸久任等因到臣據此該臣謹會同巡按監察御史
王世揚議照生民之休戚係守令之賢否而表率令長
以保安民生者郡守之責尤重嘉興統屬七縣賦重訟
繁號為劇郡惟往時知府楊繼宗以廉明聞而民至今
德之以繼宗在郡九年故也今查知府龔勉前令嘉興
已協士民之望繼守該郡益為遠近所歸興革無遺教
養並舉蓋輕車得熟路之便而來暮愜去後之思即令
步繼宗之芳躅何難今若循資遷官而去則地方既難

以遂借寇之情而本官亦無以竟牧民之願矣方今聖明在上拳拳以覈吏治安民生責臣等撫按官臣等敢不仰體聖衷加意考覈除物議大著者已行糾叅外賢如龔勉安能不為一方乞留蓋不肖者去之惟恐其不速賢者留之惟恐其不久一郡守去留之間而吏治之勸懲民生之利賴胥此焉繫矣既經該司議呈前來相應具題伏乞勅下吏部查議覆請合無將知府龔勉先加服俸留任供職即不能如楊繼宗九年若侯再歷三

年政績益著破格陞擢於地方裨益不淺矣

司農告匱年甚一年敬遵明詔陳末議以備採

擇疏

督撫

准戶部咨該本部題奉欽依將萬歷十三年起運漕糧再折一百五十萬石照今年見折規則浙江五分若地方豐熟百姓不願改折者聽漕運衙門預先派撥撫按官將應折應運本色明白具奏等因又為懇乞天恩俯賜議處漕糧以蘇運務以拯民困事准戶部咨該臣謹

會同巡按御史題前事本部覆奉欽依咨行撫按官將
該省萬歷十三年分漕糧通融派折十分之三折色每
石兌運七錢改兌六錢連席板脚耗輕齎在內行糧免
徵新城於潛昌化三縣准全折一年等因各備咨到臣
准經案行浙江布政使司遵照及又會牌行司通行各
府州縣掌印官召集糧里從公查審通融酌派務求民
便呈報去後今據該司呈稱依奉行據杭州府申稱除
新城於潛昌化三縣奉文全折外仁和錢塘富陽餘杭

臨安額米不多甚苦搬運願全折海寧地近水次願折五分嘉興府申稱海鹽平湖米多且水次更近願全運本色嘉興秀水崇德桐鄉願折三分嘉善願折五分湖州府申稱歸安烏程願折三分長興願折二分安吉德清武康願折五分各等因到司該本司左布政使衷貞吉右布政使余一龍看得杭嘉湖三府額派漕糧陸十三萬石今奉議改折據各州縣派撥分數除本色三十八萬八千石四斗外共折色二十四萬一千九百九十

九石六斗通融計算十分內改折三分八釐四毫民情俱已允服但查部文原議止免改折三分行糧今多折八釐有零行糧似應一體議免呈乞會題施行等因到臣據此該臣謹會同巡按監察御史王世揚查得浙省漕糧已奉旨改折三分而先是部文行議改折五分如有不願許臣等具奏比臣等議減銀數免行糧不蒙盡允恐一切改折三分民亦有不便者故查產米多寡水次遠近逐一酌審民情而民之產米寡者水次遠者以

其得免行糧也遂亦稍稍願改今據該司呈開各州縣
審定分數或多或寡或全改或全允通融總計十分內
改折三分八釐肆毫較臣等題奉欽依三分之數稍多
視部奉欽依五分前數尚少既稱民情允服相應准從
及查改折行糧近蒙聖恩免徵前議原止三分今改折
數逾八釐四毫其應徵行糧數亦不多若仍派徵不惟
民駭異同亦非所以廣皇上一視之仁既經該司議呈
前來合行具題伏乞勅下該部查議覆請將萬歷十三

年該省漕糧准照今議仁和錢塘富陽臨安餘杭五縣
照新城於潛昌化全折安吉州海寧嘉善德清武康四
縣改折五分嘉興秀水崇德桐鄉歸安烏程六縣改折
三分長興縣改折二分海鹽平湖二縣全兌本色共改
折三分八釐四毫行糧照見折分數免徵每兌運一石
折銀七錢改兌一石折銀六錢連席板脚耗輕齋在內
徵完依限解部庶國計有裨而民運亦稍蘇矣

府佐貪穢究覈已真懇乞聖明亟賜罷斥以肅

吏治以阜民生疏 督撫

據浙江按察司按察使馮時雨呈問得一名楊萬言招
年四十四歲福建漳州府南靖縣籍同安縣人繇選貢
歷陞浙江金華府通判萬歷十年十月初三日到任至
萬歷十一年閏二月內萬言蒙委署蘭谿縣印本年六
月內因本府地方荒歉行文禁米出境萬言轉行已問
革回籍典史高起鳳出示禁約比有已到官富民趙三
四等有米要行遠出糶賣不合率衆出銀共十二兩與

高起鳳轉送萬言不合接受入己私放及有問結在官
唐子遠有婦徐氏賣與已到官江思道為義婦後因晒
穀跌死比唐子遠添捏打死情繇具告萬言准行高典
史相驗江思道告要免簡高起鳳向伊說稱你可將銀
送與縣堂方可免簡江思道不合聽從將銀十二兩交
送高起鳳代送萬言又不合收受入己問擬江思道等
各杖罪發落至本年八月十四日萬言將印交與許縣
丞署管田府後至萬歷十二年六月十五日永康縣鍾

知縣病故隨蒙仍委萬言署印點將已到官吏翁朝佑
呂邦本各承管支應并直庫收放錢糧萬言又不合接
受各常例銀共二十二兩入已以致二吏狎恃各不合
因而侵冒官銀俱已總計翁朝佑十三兩七錢呂邦本
二十二兩七錢二分零及故違指官誣財計贓徒罪以
上發邊衛充軍事例并以承行名色誣索事犯銀翁朝
佑四十七兩六錢呂邦本二十九兩三錢陸續入已比
有在官呂十七因人命牽連被翁朝佑將保狀故稟萬

言標註監究事樣嚇取伊銀一十二兩萬言收受入已
該縣春秋二祭用鹿二隻比已到官庫書潘桂等不合
向以羊代萬言將各責治坐追潘桂等名下二季鹿價
銀八兩作為公用又不合乾沒入已本年八月內該萬
言考取童生有未到官郎鳳鳴吳大樂各不合行求共
備銀十二兩萬言又不合接收續取類送後有未到官
林應豸入學隨備表裏銀十二兩送謝萬言亦又不合
收受入已及有已到官應予嘉與問結應六五採摘柏

子忽爭互相紐打各具狀赴訴萬言准差未到官楊廿四行拘不合嚇索應子嘉銀十二兩過送萬言又不合收受入已擬各不應納贖應子嘉供明查係鍾知縣有行仍追應子嘉出銀五兩併罪外科罰別起事犯俞朝忠銀十二兩李浩九銀六兩俱送鍾知縣助喪訖萬言署印問過犯人金四等各起紙贖共銀一十八兩三錢七分零侵收入已併各贓私多係翁朝佑呂邦本過送萬歷十三年四月內蒙金衢守巡二道訪將萬言前項

贓私實跡併各役玩法侵誑事情具揭通行呈報巡撫
溫都御史巡按王御史會行按察司拏問隨蒙審發杭
州府致蒙余知府審出前情萬言又不合將追匿金四
等紙贖各銀兩隱不供出取供問擬萬言徒罪翁朝佑
等引例充軍趙三四等杖罪具招解蒙本司審得楊萬
言侵索多贓彰彰可據且署印紙贖一無追解不知作
何支銷仰王推官覆究招報隨蒙本官查得萬言問追
金四等紙贖並無支銷下落委係侵沒隱匿不供致蒙

將萬言等照原擬罪名具招呈蒙本司覆審轉招通行
呈解撫按二院又蒙本部院詳審招情未盡批行本司
覆究招詳蒙司轉發杭州府余知府再加研審萬言方
將原受事犯銀兩實情供出復蒙具招呈解本司覆審
無異及蒙叅看得楊萬言材質龍鍾操持狼籍攝縣事
而官銀侵冒甘為逐臭之流任姦吏而賄賂潛通殊失
烹鮮之義賊證既確徒革允宜將萬言等取問罪犯外
結得銀每兩值鈔八十貫招結是實議得楊萬言除非

因公科歛人財入己及餽送又與翁朝佑呂邦本除監
臨官吏求索翁朝佑呂邦本又除誣詐與說事過錢并
不應等罪俱不坐外楊萬言翁朝佑呂邦本俱依官物
但有人守掌侵欺者並計贓以監守自盜論四十貫律
各斬係雜犯並准徒五年趙三四江思道潘桂俱係不
應得為而為之事理重者律各杖八十趙三四等有太
誥減等各杖七十楊萬言係官翁朝佑呂邦本係吏翁
朝佑呂邦本免徒定發邊衛充軍終身拘僉妻解發遣

招達部知趙三四江思道並審有力與楊萬言各納穀
潘桂審稍有力折納工價各贖罪楊萬言贖完係犯賊
官革職為民員缺招行布政司報部銓補楊萬言候奏
請明文施行照出趙三四江思道潘桂民紙各一分罪
穀楊萬言七十五石趙三四江思道各一十石五斗潘
桂工價銀一兩三錢五分楊萬言名下該追收侵事犯
金四等紙贖乾沒鹿價共三十八兩三錢零俱還官送
鍾知縣助喪銀免追餘犯查照追贓高起鳳已經問革

田籍免提等因到臣據此案查臣欽奉勅諭節開所屬文武職官敢有貪殘不職者文官五品以下徑自拏問欽此及近奉明旨慎選有司申嚴墨吏之禁臣欽遵通行各司道府州縣共期潔己愛民以仰稱皇上奉天子民至意隨據守巡二道訪報通判楊萬言貪縱不簡事款到臣臣即會同按臣覆訪相同牌行按察司提問招解前來又經駁問去後今據前因除將犯人翁朝佑等定衛批行發遣發落楊萬言候奏請明文外該臣會同

巡按浙江監察御史王世揚參看得楊萬言器本斗筭
欲同谿壑鍾鳴漏盡曾無止足之思鼠竊狼貪不顧廉
隅之喪視攝符為利藪所在需求引猾吏為腹交聽憑
關節事無可否惟入賂即可周旋訟有是非但得錢便
為倒置贖鍰已不當取更加罰之謂何鹿價固所宜追
乃乾沒則可恨所幸職不逾例猶得罪止擬徒據法非
冤揆情允協既經司府等官查勘明確又該臣等覈審
相同理合具題如蒙乞勅都察院再加議擬上請行臣

等將楊萬言追完贓贖革職為民庶墨吏咸知法紀之
嚴小民得免剝削之苦其於聖明願治之懷未必無一
二少慰也

段解限迫工料難湊乞賜議留例銀酌定限期

以便織造疏

督撫

准工部咨該內承運庫太監孔成等題稱坐派段疋專
供御前賞用限寬不能接濟乞勅撫按已後未完坐派
分為兩運限萬歷十三年四月八月內盡數解完等因

奉聖旨這坐派段足着行與各該撫按官嚴督所司如法織造歲造拖欠未完的上緊嚴催完解欽此備咨前來准經案行浙江布政使司欽遵織解去後今據該司呈稱查得浙省原奉坐派段二萬五千足估工料銀一十八萬二千六百五十一兩四分零分為十運每年一運解二千五百足扣至萬歷二十年止初運限萬歷十一年七月尋改限十年十二月解進又奉嚴催二運三運即織完四千足解訖又嚴催四運五運復織完八千

八百二十四疋及蟒衣斗牛三百四十八疋解訖以原
限計之已足萬歷十一年起至十六年五運三分之數
原派民間機戶自辦工料織造價值該銀四萬有奇尚
未完給令該庫欲將未織段一萬一千八百餘疋限八
月內解完時方織進袍服庫藏空虛前留織造銀因奉
蠲免愈少限期甚迫難以措處呈乞會議具題限期照
原議候萬歷十六年起織如自萬歷十三年始每年織
解二千五百疋將工部見開事例銀留一萬六千餘兩

或織解數多盡於事例銀內支用等因到臣據此該臣
會同巡按浙江監察御史王世揚查得浙省坐派賞段
二萬五千疋原分十運原限萬歷二十年解完乃未幾
併催二運三運又未幾并催四運五運今又併催六運
七運八運九運十運是先以二年而完五年應解之數
今欲以五年應解之數而完於一年該庫為各省未完
分數較浙省必多其預解者較浙省必少故通行題催
以致部文一槩催解即今預解舊價未給民已涵涵訴

討新價措處無從再難強民代織查前撫按及工部皆
曾以寬減賞段上請我皇上軫念民瘼雖供用袍服亦
減三分之一如蒙聖慈俯念袍服雖減前留織造銀以
蠲免自少難以湊織賞段節縮賞賚量減段數庶公私
不致大匱萬一賞賚缺用必不容已伏乞勅下工部查
各省未完分數定一易辦期限上請事例銀准照每年
織解段足多寡留用庶辦織小民不致獨累如往歲下
情不能上通而於國用亦無誤矣

酌議調補縣令以安民生疏

臣竊惟親民莫如縣令而縣有繁簡以器使人則人才皆適於用兩浙如金華府屬頗多巖邑而東陽尤稱難治為八邑最非甲科素練達者治之鮮克有濟自知縣龔聞道物故邑事遂多廢弛近經題缺除補尚未有期即除補恐初試為令者未必輒與地方相宜卷查先准吏部咨該工科給事中王毓陽條議本部議覆咨行撫按官通將所屬府州縣正官嚴加查訪應更調者通限

一月內具奏等因題奉欽依通行欽遵外該臣會同巡按浙江監察御史王世揚查議得嚴州府淳安縣知縣嚴貞度明敏能防左右心思常在閭閻催徵真不擾民澹泊至於廢禮但該縣俗厚事簡以本官處之誠未足以展其驥足處州府青田縣縣丞鍾文瑞素恥詭隨綽優幹濟雖左遷而志不少懈屢署邑而事皆有條懲艾已深才猷日練淹處縣佐亦未足以鼓其牛刀今若以嚴貞度調任東陽以鍾文瑞陞補淳安則在嚴貞度當

盤錯之會而利器自別在鍾文瑞感桑榆之拔而收效可期是以國家器使之道竟各官未盡之長而就近量移以責治效以安民生計無有便於此者伏乞勅下吏部查議如果臣等所言不謬將嚴貞度調任東陽縣知縣鍾文瑞陞補淳安縣知縣各赴任供職施行

地方異常災傷疏

督撫

據台州府申據仙居縣申據本縣里老尹璜等呈稱縣坐山僻止靠農田今春以來雨不及時分秧遲晚夏末

秋初根苗方秀又值雨水太多早禾僅得半收晚禾發
蟲遍野螟白不期八月初九等日狂風大作猛雨傾盆
洪水汎濫田地衝坍禾稻腐爛顆粒無收男女淒惶展
轉溝壑乞賜申達拯救等情到府轉申到臣就經批行
浙江布政使司會同台州兵巡道作速勘明呈報以憑
具題去後今據該司呈稱行准兵巡該道僉事周守愚
手本開稱行委該府推官王道顯督同知縣湯聘尹遍
歷都里逐一履畝查勘得該縣地方僻坐山隅水性寒

濕早禾僅種二三止獲半收晚禾反居七八夏月發秀之時纔覺生蟲秋間吐穗之際蟲勢愈盛風雨連綿遂致攻心蠹節繼遭大水湧漲水退旬日高阜者蝶死殆盡一無結實低窪者衝坍淹沒沾泥就槁顆粒無收各鄉田中一望枯槁尚存即以該縣田畝傷數乘總通計算被災七分之上等因到司該本司查得仙居縣秋災雖已過七月於例以為後期但該縣被災於八月初旬覆勘委為重大難以拘泥常例呈乞先為具題所有應

賑應蠲事宜仍聽本司備行該道議覆至日另詳等因
到臣據此該臣看得台州府仙居縣坐居山僻商賈不
通小民惟以耕種為生計即時和年豐猶然稱累乃今
秋晚正當結實之候先以蟲蠹繼以水淹致使顆粒無
收俯仰失望委為異常災傷此皆臣待罪地方奉職無
狀之所致也除痛自修省及督行布政司會同兵巡該
道將被災分數再勘的確另行酌議蠲賑外伏乞勅下
戶部照例轉行巡按御史覆實具奏施行

糾劾方面官員以備考察疏 督撫

臣叨撫兩浙適當三年考察之期例有糾劾於方面官員尤加意體訪除照常填造賢否冊揭咨送部院查考外謹按原任浙江按察司溫處兵巡道副使陳澗刻薄不體民情恣肆惟圖身便守衢全無惠政歛怨實有煩言理詞則原被不分惟喜罰贖收餉則出入任意但較羨餘市硃不堪雖十餘觔盡入水傾擲買絹稍惡縱數十疋亦信手割殘及轉憲司尤多戾政散兵糧月扣一

二十兩積送者把總陳仲紳也而仲紳因以倚勢為奸
取溪紬數至百十餘價被抑勒受害者鋪戶王伯等也
而鋪戶或以索價杖斃指禮儀以取土物假犒賞以取
漁稅鄉官兵士徒受虛名嫁賊跡於李知府縱狎昵於
祝頑童官常行簡真成掃地此一臣者穢跡久干公議
休致未快輿情所當照不謹例閑住者也浙江按察司
寧紹台分巡道僉事周守愚才本可以有為而功名之
心太急每任情而拂衆學亦足以飾治而充厲之氣欠

平遂賈妬以招尤理詞不悉原被之情即片言決斷徒滋告擾馭兵不恤行伍之苦乃任法朴責難免逃亡繩吏書不善關防致詐騙踰垣真法愈嚴而人則愈玩察屬吏欲懲貪黷乃評品多舛蓋實未覈而名則是循同僚副使林偕春被論懷忿以素多滄訛之嫌安在其為協恭舊屬知縣陳九功退有怨言以不却臨行之禮安在其為體恤且以下僚陟本省方面既人與已多相猜疑而以淺衷當最要海防自官與地兩不便利但性本

有執絕不類渙恣之流才可曲成不難收桑榆之效此一臣者所當照不及例調簡者也伏乞勅下吏部都察院再加查訪照例考察施行

糾劾有司官員以備考察疏

督撫

臣叨撫兩浙適當三年考察之期例有糾劾於所屬有司悉心體訪除照常造報賢否冊揭咨送部院查考外謹按台州府知府張會宗性甚寬平而意氣未免消沮心若抑畏而事體難望精明知事素行可收各縣之糧

出有扣入有加雖坊里王汝應等側目怨言亦不覺察
庫吏徐光裕收童生之卷或十金或二十金致生儒金
汝濟等買置高等竟罔聞知以考拔之恩而存鄉官何
知府遂縱伊子大壯等乘機肆詐無乃薄己厚人以同
鄉之故而庇太平陳知縣且坐小民應善等誣告重罪
豈是愛民約屬問詞遲疑承行吏董大成等已需索害
民矣乃又有於發落票內私加稍力者左右真如虎翼
徵糧怠玩經管吏邵興道等已捺解勒例矣乃又有於

收放餉銀私扣數兩者姦弊何啻蝟毛贖鍰妄費雖無
暮夜之金餽贈全收亦有廣財之號原任處州府知府
今丁憂陳九敘心無矯飾而察姦之智未周學類迂流
而理繁之機猶滯牌票不分緩急一郡之勾攝何堪裁
決盡倚吏書各役之需求特甚禮吏程觀國以造童生
冊騙銀矣而門子葉一材復與交騙富童張經等足徵
法紀之太疎千戶杜經邦以訪武職詐人矣而姦吏查
春復與同挾把總曹應龍實由防閑之欠密監生張綬

以人命姦情收獄用銀一百兩求吏吳伯淑出豁雖本官未必知情而羣小之舞弄已甚商人張松以木牌匿稅被逮用銀四十兩託吏陳守銓過送雖本官未必即受而政柄之下移可知在任而親族之往來甚多縣驛豈能不累瀕行而軍儲之支放太迫物議安得不生原任嘉興府通判今陞任高珍才本昏庸志尤貪鄙居官全無幹理遇事一味苛求以衙吏萬全漁民而受嘉興等縣白糧解戶張舒等例銀約有三百用甲首謝祖罔

利而受秀水等縣白糧船戶劉茂等例銀一百有餘署
海鹽因收頭張墀等耗羨不足罰穀百餘石實歸囊橐
署嘉興見僧人定倫建屋起釁罰銀二十兩始放焚修
領運回任不辭各縣花幣已可醜矣乃嘉善少幣一端
亦逼令縣官買補何計利不遺錙銖署府送禮妄派兩
縣糧解已可駭矣乃衙內雞鶩微物亦派及舖行納價
真多慾不啻谿壑嘉興府通判楊瀧志本怠於左遷智
亦昏於多慾署崇德以沈德代唐曉發遣雖沈德已受

私幫而唐曉之出柙謂何准詞訟為王科嚴比謝啓望等債銀致劉阿四累死而計子明之騰謗有自部白糧受解戶潘林等例銀已極多矣而運糧船頭又逐名索銀二兩方許駕運催漕糧受解戶潘應龍等例銀亦不少矣而領解折銀又發出傾銷竟重允百金以潤私囊進京受水手於屬官恬不為愧賒貨致虧損乎行舖習以為常况酒色是耽政事難望振作而刑罰且重怨讟業已叢生原任紹興府通判今陞任楊莊外飾謙恭中

懷譎詐小才雖堪任使巧計極善彌縫署上虞以盛筵
曲媚過賓致三月有八十金之費署各邑以敏斷多收
罪贖有半月得半百金之謠丈勘欺隱田糧凡巨室有
新墾者輒與開除真畏勢重於畏法清查冒免差役凡
左右有關節者隨行寢閣徒為私不知為公減軍糧於
署郡印張朋已赴道稱屈矣而反坐誣恐衆軍之耳目
難欺圖奇貨於署理刑張大祥已被告人命矣而乃未
減致朱氏之冤魂無愬倚書手陸良等罔利而急完文

移以悅上官真是巧宦之俠用斗級余敬等過銀而取
給口說以愚僚友豈非漏網之魚原任慶元縣知縣今
陞任史著勲性頗機警才亦圓融筮仕尚博能名末路
大改前節受污吏吳詔銀帶金杯遂令管庫致盜庫銀
四百餘兩扣民壯鮑子元等工食指給書手實半入囊
每年不下四十餘金去府城令里排供應往來甘違明
禁遇節慶受富民杯盤花段不恤謗謠理詞多靠錢神
周蘭聰五十金葉孔昭四十金吳言儒三十金即犯姦

敗倫皆模糊不問審徭亦通關節姚植等三十兩吳京
等二十兩鮑法華等五十兩凡糧里斗級俱索取無遺
造解黃冊請換印信清丈田糧事事不肯輕放童生進
學鄉飲延賓旌善給匾人人皆送謝儀原任於潛縣知
縣今陞任譚廷輔性類狼貪形同狐媚任家童踰垣淫
縱防簡全疎寵何榜通賄橫行苞苴公受匿張翊買和
銀四十兩用謝承渙稅契銀一百兩派阮守義家伙銀
二十兩各役之賠累何堪受者民謝棟等冠帶銀一百

兩取糧解常例銀一百兩索里長鋪陳銀五十兩合邑之需求已遍天目僧如謨罰銀二十兩方許焚修各寺院行童納銀四五兩徑給縣牒苟可得利曷恤敗官原任昌化縣知縣今陞任熊守謙外剛而內實多慾心刻而民則何堪信庫吏許應學為腹心交通無忌用戲子程九臯為門役狎昵有聲圖寺僧紹蘭等匾額謝銀卑污殊甚匿當舖胡富被盜金飾廉耻何存王之臣謀真普寺產託陳五送銀四十兩使真普有還俗之寃周龍

圖素文龍田房託劉繼明送銀一百兩致文龍有失產之恨黃公敏歛富童也以銀一百兩得稟入學而陳鳳寶八十兩邵文茂五十兩則皆以詞訟賄求徐梯邑訪犯也以銀一百兩得即回申而許際銀三十兩王偶銀六十兩則皆以爭產請託汚行大千公議劣轉未盡厥辜開化縣知縣王文昌性褊急不近民情志卑鄙且多物議受姦吏張宗元等撥置惟言是從任惡快鄭繼元等橫行使民受害追通縣駁冊罪銀另加耗贈而管庫

吏方得賢又分外索求追里長貼解役銀半入私囊而承牌人汪朝選因乘機誑詐造黃冊則假官紙扣取鋪價未見支銷查稅契則以匿稅濫罰富民竟無下落造座船而縱老人胡精倚勢遍斫墳木視民財何啻沙泥掘山河而委巡簡許潤嚴刑凍死役夫輕人命真如草芥印絹疋則於解戶考童生則於冒籍徵條鞭則於耗銀事事有誅求之謗吳大望以斫木金子龍以告許程坤秀以人命人人有通賄之名丈地不辨等則而朦朧

起科已大失百姓之心告糧不與處分而輕縱刁民幾
釀成地方之變原任宣平縣知縣今陞任黃文豹年邁
性迂法弛政玩文卷束之高閣錢糧盡入私衙雖正賦
亦聽逋負不徵凡支銷則任左右濫費息詞本以便民
也而犯人徐應雷等姦拐重情亦受賄給照獎勵本以
勸賢也而里民俞三綱等錦幃折儀亦槩受不辭斗級
苦役已扣除工食矣而復費匿贖銀偽增穀數豈思賠
累之艱前官被告已在省對簿矣而顧留難文卷勒送

餽儀奚念寅恭之義印信憑家人盜使雖交通賄賂而不知庫藏被積吏私開即侵分扒平而莫覺一籌莫展百弊叢生原任定海縣知縣今丁憂呂明倫性雖急於懲玩才實難以長民理詞而罪犯之輕重多不得情頗生怨議審丁而戶口之加減每不覈實噴有煩言行條鞭以便小民此本官創議也乃指稱轉解明加火耗令銀匠有包賠之苦收商稅不許加勒此見行嚴禁也乃另置大等委吏秤收縱積埠有侵詐之姦開局造冊而

總書每名三兩散書每名一兩姦吏烏應禎等之敢於
科派者豈盡公家正支點外認狀而鋪兵每名五錢閭
夫每名四錢快手余政等之敢於徵收者豈盡羣小竊
取清查縣基使者民羅尚綱陳鳳謨住址沒為官舍未
必皆有罪之人擅用鋪行致董世明陸秉濟臨行訴於
通衢實多去後之恨原任海寧縣知縣今調簡黃淳才
本疎庸性更狎翫詩酒而薄民事令邑務日混淆難
清喜丹青而寫扇端致門役傳倡妓不恤家奴八小厮

等恃寵用事雖丈田亦令隨行歌唱苟得賄則言無不從寵門子吳光彩等朋惡為姦因查寺受僧道泮銀物一稟白則事皆立效受主簿劉世淳厚餽而縱容巡捕肆害豈是潔己率僚用庫吏王承宗收糧而坐視重允取耗足徵容姦剥下造冊鎖禁總書為革弊也書算華大山等指誣各里銀三百兩即事發問徒何益各關查驗鹽引為通商也書手趙大拱等指騙各商銀百餘兩致上下心迹難明寧海之謗已多有庫之民何罪浦江

縣知縣蔣鳴琅性過優柔才難振作慈祥雖著於舊任
功名頗損於今官牌票則甲止而乙復行雖壯快四出
猶恐不及文移則朝發而夕不記雖左右爭匿莫敢誰
何俞良文以供書朱忠以總書橫行騙詐法令之廢弛
可知蔣惟霆以戶吏周子華以門役任意索求關防之
疎漏難免僉押而羣小叢集致來吏滿堂之謠問理而
是非不明又有魚換鰲之謗龍游縣知縣魯崇賢文學
甚優作為過激矜己長以凌人士民多怨媚過客以延


譽吏卒稱疲徐九苞管解糧銀例有幫貼而以承行吏曹槐妄稟之故僉撥貧民遺九苞以賠補之難余卸苟歐殺人命律宜正刑而以屍親徐熊得財之故止擬過失致邑民有枉法之議孫棣以虛引修學宮祝五秀以賭博脩公署終是病民訪吏尹文昌得更名復役禮吏諸葛魁因鄉飲扣銀乃屬縱惡收都總何愚等罪贖久不申報雖銀尚在庫而心則難明為同年羅舉人作興殃及寺僧雖利歸他人而怨則獨任新昌縣知縣劉庭

蕙年資甚青而性執易於招謗學識儘裕而防疎難以
懾姦日昃而始升堂安免沉閣節令有時失禮可曰恭
勤以懶散為高而宿南明寺造洞心亭豈名教之真樂
因公署被火而採民間木及墳中樹致怨議之沸騰岷
令之揭陷雖多誣詞而公出曾帶里長終違禁約寺田
之變價固未私費而科罰以充修理奉何明文用鋪行
而給價欠平致失民望稅印契而經年不發故起浮言
據新政力改前非似不必追論其既往在邑民猶騰舊

謗恐不便展布於將來寧海縣知縣孫桴性本健忘目
尤近視晝夜之憂苦無益左右之竊弄堪憐報訪犯而
王寵田豹等之濫列竟借聽於學官豈稱明恕之體徵
錢糧而趙國遠林佐等之拆封敢同謀以竊取安望摘
發之明陳應龍私剋鋪兵工食每名至二兩矣雖王淵
等通衢叫嚷而亦涵容何邦盛加允條鞭銀每兩多五
分矣致王科等窮民受害而竟不究理詞訟則曲直不
分而槩擬稍力罰贖豈徒刁疲之邑難振僉糧役則貧

富不審而多送見面土宜殆亦庸鄙之性使然以上共
一十六員內高珍史著勲譚廷輔熊守謙貪肆特甚怨
謗尤多當照貪例為民楊瀧楊莊王文昌志行不端官
箴無望當照不謹例黃文豹庸懦長姦當照罷軟例各
閑住張會宗呂明倫黃淳長吏已不勝任裁抑或可曲
成當照不及例降用蔣鳴琅不堪民牧當照不及例降
調閑散陳九敘才弱任淺魯崇賢性躁才疎劉庭蕙始
怠終悔當照不及例調簡孫桴才短而學未荒當照不

及例改教者也伏乞勅下吏部都察院再加查訪照例
考察施行



溫恭毅集卷三